



Izjava za medije visokog predstavnika za BiH, Christiana Schwarz-Schillinga na konferenciji za medije

Dobar dan svima i zahvaljujem vam se što ste došli.

Nakon nekoliko pogrešnih startova, čini se da su državne institucije Bosne i Hercegovine sada uistinu počele funkcionirati. To su dobre vijesti.

Loša vijest je da su sada Federalne institucije upravo napravile pogrešan start.

Namjerno se nisam želio uplitati u proces formiranja vlade, vjerujući da je to ustvari osnovna funkcija svake normalne demokracije.

Tokom sastanaka sa vodećim ljudima Zapada uvijek sam isticao da je jedan od indikatora napretka Bosne i Hercegovine to što su institucije ove države uspješno održale izbore i kompetentno obavili proces formiranja vlade.

Iz tog razloga mi je izuzetno žao što vas moram obavijestiti da sam danas potpisao odluku kojom se poništava jučerašnja odluka o imenovanju nove Vlade Federacije Bosne i Hercegovine.

Odlazeći Vlada Federacije BiH će nastaviti obavljati dužnost u tehničkom mandatu sve dok nova Vlada ne bude imenovana. Nova Vlada ne može biti imenovana sve dok se proces provjere ministarskih kandidata ne okonča. Upravo sam obavijestio predsjednicu Krišto da je taj proces sada okončan.

Da sam imao drugog izbora ne bih postupio ovako. Međutim, bio sam suočen sa očitim pokušajem manipuliranja procesa provjere kako bi imenovali kandidata koji je bio sporan, te sam bio prinuđen da reagiram.

Vlasti Federacije nisu mi ostavili drugog izbora.

Na početku svog mandata, rekao sam da sam spreman upotrebiti svoje ovlasti u slučaju da je stabilnost ove države ugrožena.

Nema sumnje da bi Vlada Federacije, koja je popunjena adekvatnim ministrima, bitno umanjila sposobnost ove države da uspješno obavi zadatke koje joj predstoje tokom naredne četiri godine.

Činjenica je da barem jedna od osoba koje su jučer imenovane nije bila podvrgnuta detaljnomy procesu provjere.

Neću sada imenovati pojedince. Proces provjere kandidata nije javan.

Ured visokog predstavnika obavezao se da ne komentira proces provjere kandidata i ja namjeravam ispoštovati svoje obaveze, čak iako to drugi nisu učinili.

Moj ured je informirao zvaničnike Federacije o razlozima naše zabrinutosti u vezi ovog procesa, prvo pismenim putem u srijedu, a zatim telefonskim pozivom u četvrtak. Također smo bili uvjereni da smo pronašli rješenje kojim bi se ova situacija izbjegla.

Dakle, ova situacija se apsolutno mogla izbjegći.

U pismu upućenom Uredu visokog predstavnika 9. marta, predsjednica Federacije Borjana Krišto zatražila je da se provede provjera kandidata za ministarske pozicije u Vladi prije njihovog imenovanja.

Jučer, Ured visokog predstavnika obavijestio je lidera Federacije da ne mogu usvojiti novu odluku o imenovanju Vlade, sve dok iz Ureda visokog predstavnika ne dobiju izričitu obavijest da je proces provjere kandidata za ministarska mesta završen.

Vlada Republike Srpske, kao i svi kantoni u kojima su vlade do sada imenovane, poštovali su proces provjere kandidata.

Ne vidim razloga zašto bi se postupalo drugačije u Federaciji BiH.

Usprkos činjenici da je provjera kandidata sada već dobro uhodana praksa koja se primjenjuje širom zemlje, usprkos činjenici da je Ured visokog predstavnika primio zahtjev za provođenje procesa provjere kandidata i usprkos činjenici da je međunarodna zajednica jasno stavila do znanja da je zabrinuta zbog pojedinih kandidata, lideri iz Federacije BiH su požurili da imenuju sve kandidate prije nego što je Ured visokog predstavnika bio u mogućnosti da objavi rezultate procesa provjere.

Čuo sam da se sugerira kako je odlaganje formiranja Federalne Vlade prouzrokovano procesom provjere kandidata.

A to nije slučaj.

Sistem provjere kandidata uživa puno podršku iz razloga što su građani Bosne i Hercegovine svjesni činjenice da se prečesto dešavalо da na visoke pozicije budu nominirani kandidati koji očito nisu bili pogodni za obavljanje tih dužnosti.

Proces provjere kandidata također je nesumnjivo doprinjeo poboljšanju kvalitete vladanja u Bosni i Hercegovini.

S obzirom na petomjesečno kolebanje zvaničnika Federacije BiH, mogu samo zaključiti da je užurbani potez usvajanja odluke o imenovanju nove Vlade, samo nekoliko dana prije nego što je moј ured trebao objaviti rezultate procesa provjere ministarskih kandidata, namjerni pokušaj zaobilaženja i manipuliranja procesa provjere.

Ured visokog predstavnika, jednako kao i drugi, želi da se imenuje nova vlada Federacije BiH što prije. Međutim, s obzirom na pitanja sa kojima će se ova država morati suočiti u naredne četiri godine, Ured visokog predstavnika i dalje stoji iza svog stava da je neophodno provođenje procesa provjere kandidata do kraja.

Hvala vam.